

# Tesaronakaahiyaapi Utipiho Kapiho

## Kimandi 2 Tesaronakaahiyaapi Utipimandapi Nesipihande

Tesaronakaahiyaapi utipiho jiho Poriho jipatipiyati nusoasataise. Nusoasatosati otihi masiwonji bimainjati ami kinaungwiha naasiketi ami utipiho wo ipotiho nusoasataise. Kiya satiwi Awaisiho aimi japihi napise, tiwi katiwi yayauhi kandapi ko utipiho japihi wo jipatipiyahore. Jipatipiyati biyati nusesipati Awaisiho japihi nasonihura sapa siyati noaipati saimatitaise, undati kaundati jipatipiyahore.

## 2 Tesaronakaahiyaapi Utipiho Napimasataise

Poriho isihiyai ipihirete undisiha (1:1-2)

Nyahi nahatiyaani Awaisihomi ambipatapi naajihandi ambipati yaasihandi nehaawaahi sandihi gaare undisiha (1:3-12)

Autahaatihomi Itipiho Gaaho kimaapi yapimbataapihi ahotisihoai nemaitaise. Nemahonihira sura ipoti Bwaasirihirami watipihandi auta noaipaitaise. Saiwa siyati sanoti owetanihi Awaisiho japihi napitaise tisiha (2:1-17)

Autahaatihopi giwunyaahohiyihyaami gaahaiwa kiyohiwaiwa napoti owemetati kaiwaanihi ahotimi none undisiha (3:1-15)

Poriho piwiha owemati kiyai ipihirete undisiha (3:16-18)

## Asisiha Autahaatiho Isihiyai Neti Tipitapaati Usondandiha Ipotinihi Noaipaitaise

**1** <sup>1</sup> Nyahi Porihoninitihira Sairaasiyi Timoteyaatihi utipimandi kimandi sahi Kiraisihomi isihiyaati aunahipati awaipati Tesaronakaahanda bimohiyihyaatapi jipatipiyaati nusoasahaayo. Sahi Kiraisihopi giwunyaahohiyihyaati sami giwunyaahohitihanda noaipati Autahaatiho nyami Apihoaisawuni, ami nyami Awaisiho Jisasi Kiraisihoaisawuni timaamaitohiyihyaatapo. <sup>2</sup> Autahaatiho nyami Apihouni ami nyami Awaisiho Jisasi Kiraisihouni sangi gaahati kasimi jatatamanimi sami maariho nepi yatihisipi napaisaatisamapi jainjatitaatimi nyahi sapi gaapundihaato.

### Tesaronaikaahiya Naanihaiwa Nusoipasihura Andititiwi Bitopihiyaare

<sup>3</sup>Naisihiyaati nyamataiwi Kiraisihopi giwunyaahohiyihyaate, nyahi sapi gisunyaawaati, ami sapi nasisoaari Autaahaatihoai, 'kinyi gaahone gaare,' undihaato. Ami sandihi nyami titihi otipipatisi apipaahi gaare nyahi sapi kaitihaawe. Ami sahi Kiraisihopi giwunyaahohitihandi noaipati watipitati ami sahi ninaasiyaatihi sami naisihiya usa samataiwi Kiraisihopi giwunyaahohiyihiyai maariho baiwi jinjapihi nunyauhi ami sandi kandi maariho nunyohitihandi waati awaindemapi kaimi niyauho. <sup>4</sup>Sahi siyohitimandi kimikandapi nyahi yawanaani sapi maaritaati naimaatihaayo. Iyaati ami nyahi Autaahaatihomi isihiya Kiraisihopi giwunyaahohiyihyaamihatihini nowaati kiyai kaundaati sami ambipati nasimaawaati awaindewaasamihaayo. Sangi isihiya sami tiworisa yaasihaiwa maipihaiwa kasisauhi ami kaiwa yaasihaiwa kiyaatinihini nepi nowaaheti keti sahi Kiraisihopi giwunyaahohitihandi andititiwi isiwatiwi kiyaatinihini kopi taawi giwunyaahauhi kandapi kaundihaato.

### Autahaatiho Nyangi Titihini Gaahireti Tipitapaati Nyasonahore

<sup>5</sup>Saiwa sangi taati nasoapisiwimaiwaraahi Autahaatiho nyangi siyati neti nanyinjataise, ko titihini gaahosi gaahati kiyati ami nyangi titihini gaahireti neti tipitapaati nyasonataise. Iyati ami saiwa sangi sami ambipati maariho yaasihaiwa sangi tiworisa nasanyauhi taawi nehohiwiwa neti siyati ausaimanati sangi nasisataise, ami ko Autahaatiho neti sangi komihyaatesamati ami ko noaipati sami Awaisiho Jihotati, ami ko apipaahiyaati kiyaatangisinihi jinjapihi jainjatitendo. <sup>6</sup>Ko titihini gaahosi Autahaatiho titihini gaahati siyati kaitaise. Isihiya sangi yaasati naanijihaiwa nasanyawi nasopisasohiyihiyai yaawihaiwa numwitaise. <sup>7</sup>Iyati sahi yaasihaiwa isihiya nasanyauhi taawi nehohiyihiyaatangi yaasiwaiwa nesamati ikindaatiwihandi nasamitaise. Iyati ami nyangisangi maawi ahoyati ikindihaahandi ko nanyamitaise. Sandi Autahaatiho kaitaise nyangi nyainjatisiho Awaisiho Jisaasihoai neti ausaimanihonihini, ami ko komi otipipatihiya yamihapataatihapihiya watipihiyaisati sisiha tihwitihiri paanihaataatihi yamihapataatihiraapi nasonihuraaro. <sup>8</sup>Ko isihiya Autahaatihopini mmoniwi giwunyaitaatiwi poundihini pohipaiwi, ami nyami Awaisiho Jisaasihopihini piwihini gaaha wanihi minjapepihiriwi ami kaami otitihini pinamaayohiyihiyai wihoanijihaiwa waati yaawihaiwa numwitaise. <sup>9</sup>Nyami Awaisiho Jisaasiho komi ndimaahomwaanijini nausainjitihandi, ami komi yundanyihini watipihaiwaapihapini kiyai nawisatemati kiyaami maipihaiwaapi maipihandi wihoanijihandi kiyai numwitaise. Iyonihini kiya windi ikimaaniwi kiyaanini yaawihandi naitaapo. <sup>10</sup>Autahaatiho saiwa siyati kiyonihini noaipaitaise, nyami Awaisiho Jisaasiho nyahi komi isihyaanini

giwunyaahohiyihyaanini nyahi titihi ko sawahomihyaanimatitihaawi Autaahaatiho nanyamihainjawihyaanini koai ambipati awaipati numwisaihi naitandi nasonihura sangi maawi katihitiwi, ami Jisaasihoai sahi ambipati awaipati numwitaapo.

**Porihouni Komi Naisururuni Autaahaatiho Tesaronaikaahiyai  
Anditiwiwitandi Kiyaapi Gaapundawaayopo**

<sup>11</sup> Ami saiwa siyati sangi nasoipaitandaiwaiwaapi gwinyaahaawi nyahi gaapundihaahura sapi nyahi nasisoaari kiyaaninihi sangi Autaahaatiho anditisiwitandi koai piwaundaati gaapundihaato. Ami sahi wapa gaahapa Autaahaatiho maaritati gwinyaasipipa kaitaatiwi gaatati nasamaasipipa sahi nga kaitaatiwi ko sangi neti watipisamati gaasamaitandi nyahi nasisoaari sapi koai nunjenaati piwaundihaato. Iyataati ami sahi Jisaasihopi giwunyaahohitihandi neti sangi gaasamati anditisiwhonihini ami sahi gaahapa kaitaatiwi Autaahaatiho maaritihini ami sahi sawanaatangisangi kaitaatiwi gwinyaapi maaritohipipa kapa titihi kaitaatiwi sapi Autaahaatihoai nyahi, 'kinyi gaahonge gaare,' undaati piwaundaati gaapundihaayo. <sup>12</sup> Ami sahi sandi saisaihi sapimatonihini isihiya nahatiya nyami Awaisiho Jisasi Kiraisihoai niwimaapi ambipati awaipati numwisaihi, ami ko nyami Awaisiho Kiraisihouni ami isihiya nahatiyauni sangi mepi autaahepismapi nga baiwi jasoniwi jainjaito. Ami Autaahaatihouni ami nyami Awaisiho Jisasi Kiraisihouni sahi wapa gaahapa windi kamaiwi nehihandi sangi gaahati kasirihiretapi saiwa sangi nasoaiapa sasimatitaise.

**Utaaho Winihapipa Nemati Winihapipaapi Pohipiyaho Noaipaitaise**

**2** <sup>1</sup> Nyami naisihyaati nyamataiwi Kiraisihopi giwunyaahohiyihyaate, nyami Awaisiho nyahi kopi giwunyaahohiho japihi nasonihura Autaahaatiho nyangi neti ahonyisonihini, ami nyahi koaisaati nutanaati niwipaawaati iwinjaitihaahuraapi nyahi sangi kasatitihawiyoni sahi atihiri mwitipisawi atiwise. <sup>2</sup> Sura asisihia Awaisihoaisaati nyahi nutanaati iwinjaitihaahuraapi sangi isihiya usa sasatiwi, Awaisiho asisihia napitandihia aimi noaipase, tiwi kasatawaayondiho? Iyati ami utaaho woai Autaahaatihomi Itipihohi Gaaho piwiha sataha kaundihi ko atisati neti ausaataindiho? Ami isihiya usa piwiha ausaawaahiya sa piwa katawaatondiho? Iyati ami isihiya usa nyapi satiwi, Porihoaaisawihiya aposerihiya piwiha satiwiha utipihoaatihini jipatipiyopo, tiwi kasatawaatondiho? Sahi piwiha siyahaiwa nyami Awaisiho Jisasi Kiraisiho japihi napitandihia asisihiaapi ka aimi noaipase, tiwiha atisawaahandi kandi sahi keti yaiwi sami maariho omanjititihini, ami sami amitiha jandoti yaiwimapi mimaiipimaasimatane. Titihini sami maariho gaatati ami amitiha jainjapwaatonihini gwinyaapise. <sup>3</sup> Sahi woai nehi nanihaiwi

iwinjasaihi ko piwiha katati ami ko wapa kiyati daayati bitosiwaiwaara sangi windi jaipimaasatane. Sahi atiwu ami gwinyaapise. Sa Asisiha nehi keti windi namoipaitaise. Owe. Ami jihinihi isihiya taahiyihiya apipaahi awaindihandi Autaahaatihopi pohipaiwi komi winihapipa nemapi, ami apipaahi awaindihandi maatimaatiwi wiretitiwi ami iwiritaapo. Saisaihi ami utaaho apipaahi maipihom maipihaiwa asakiyati pihitati kaitandiho noaipaitaise. Ko winihapipaapi apipaahi poundati pohipiyaho Awaisiho Jisaasiho nasataahura Autaahaatiho koai neti sisihaapihi tihaitaise. <sup>4</sup>Ko siyati noaipati nahataapa isihiya nepi kiyaami autahaatihoemapi atotipiwesawi kapaapi gwinyaapi gaapundiwi, ami sapa nyami autahaatihoe, tohipipaapi pohipiyati manditipaitaise. Ko siyati sawaho neti autahi naimaatati jihimatati sapa nahataapai neti yatihiwati ipihatitaise. Iyati ami ko Autaahaatihomi anaan awaindihandaatihi nandaati bindataati ami ko sawahopi satati, 'Nini Autahaatihonine,' tati katitaise. <sup>5</sup>Sahi gwinyaitaapo. Nini sangisati maasi jiji Tesaronaikaahanda bimohura kimikaiwaapi sangi nini aimi kasato. <sup>6</sup>Iyataahandi kandi ami windi yahandi wani taati niwisapuwati ipatisataise, ami ko Uta Maipo wani namoipaitando. Ami sandi taati niwisapusiindapaahi sahi aimi mmoniwi gisunyaatahiyaate. Iyataati ami utaaso so apipaahi maipo keti windi noipati amusaimaninati noti asisiha akurura Autaahaatiho namihainjiheti koai Autahaatiho neti ausaimanitaise. Ausaimanihonihi ko ami autahaatiho. <sup>7</sup>Ami nyahihi saiwa utaaho maipihomi apipaahi maipiwa noasandiwaiwa ami kaiwa Autahaatiho neti autemati nyangi nanyisihi mmonihaayo. Ami isihiya taahiyihiya maipihandi taawi wani kiyawaayopo. <sup>8</sup>Ami Autahaatiho utaaso niwisapusoai nawisatemahonihuraahihi so uta maipo koai Autahaatiho sawaho neti ausaimanihonihi ko autahaatiho. Iyonihi ami Awaisiho Jisaasiho nasataahura komi maarihomi ditihiri mbipaara so uta apipaahi maipo Autahaatihomi winihapipa nemati ami maatimaatihirami tanyaaho sapoai tiwamaitaise. Awaisiho komi nausainjitihandi apipaahi watipihandi awaindihandisa autahaatiho neti so uta maipo winihapipa nemasoai neti apipaahi daahi koaisinihi nopisasamati komi watipihandi neti owemaitaise. Iyati koai neti sisihaapihi yotitaise. <sup>9</sup>Iyataati ami so uta maipo winihapipa nemaitando autahaatiho ausaimanindandindi sandi Bwaasirihiri kirami watipihanda otipipati waati kaindihanda noaipaitaise. Ami Bwaasirihiri so uta maipoai watipihandi numwitaise. Nunyonihiri Bwaasirihirami jaipipaara siwipati watipihaiwa nahatewa kihaiwa kihaiwa kiyati, ami watipihaiwa otipipati kihati kihati kaitaise. <sup>10</sup>Iyati ami ko jaipipa nahataapa kahatamatipetihapa isihiya mmondaatiwi kaiwaiwaara isihiya nepi nopisasaniwi owetitaatiwhira taawi niyohiyihiyai jaipunditaise. Iyonihi ami isihiya nepi nopisasaniwi kiya owetitaapo, ami Autahaatiho komi piwiha akitiha kiya ka atiwu

giwunyaasaihi, ami kiyai nga ko japihi numwaitotati kaundihi ami kiya ka piwa atihomiwi, ami kaapi kiyai apipaahi poundihi pohipiyowo. <sup>11</sup> Iyauhi ami sandi kandapi Autaahaatiho isiya siyaami amitiha ami omanjititih neti nusopisasataise, ami kiya jaipipaapi gwinyaitaatiwo. <sup>12</sup> Isi ami saiwi isihiya nahatiya Autaahaatihomi piwiha akitiha nyami Awaisiho Jisasi Kiraisihopiha kiya windi gimunyaapi, ami nehi maipihaiwaahihi maariitwi kiyohiyihiyai Autaahaatiho saundati, sahi apipaahi maipihyaatisi sami maipihaiwaapi piwiha nepise, undati piwiha neti kiyaamiheti yawutaitandi sandi Autaahaatiho sawaho kiyataise.

### **Autaahaatiho Sangi Japihi Nasamaitandi Aimi Nasamihainjihiyaate**

<sup>13</sup> Nyahi nasisoaari Autaahaatihoai gaare, undaati piwaundihaato, sahi nyami naisihyaati nyamataiwi Kiraisihopi giwunyaahohiyihiyaati ami Awaisiho maariho sangi apipaahi awaindihandi nasamisawihyaatapo. Ami sandi apaapimaah, Autaahaatiho isihiya jihapihiyai namasati numwaasawihyaami otihatihapi namasati jihyaatangi nasamaitandi yandihesamati titih sawahopihyaatangi nasamihainjihyaatitih. Iyati ami Itipih Gaaho sangi neti nehi titih Autaahaatihomi isihyaatesamasih, ami sahi komi piwiha akitiha Jisaasihopiha atiwiwi ami kaapi sahi baiwi giwunyaawaayopo. Sandi sahi piwiha akitiha waniha gaahaapi giwunyaahohitihandaahi sangi Autaahaatiho nasamaataise. <sup>14</sup> Autaahaatiho gaatih sahi koenda nasauhi ko sangi nasamaati nasamihanati yandih ko sawahomihyaatesamasih sahi kopi giwunyaawaayopo. Iyati sahi nyami Awaisiho Jisasi Kiraisihomi apipaahi gaahandi nausainjitihandaatihuni, ami watipihandaatihuni Jisaasihoisawi bimitaatiwo. Iyati nyahi piwiha gaaha waniha ausaahohihaami akaaha akitihaara sahi koenda napitaatiwi Autaahaatiho sangi nasisenati gaasatihihyaate. <sup>15</sup> Isi ami nyami naisihyaati nyamataiwi Kiraisihopi aimi giwunyaahohiyihiyaate, sahi andititih bitosawise. Bitopi ami Autaahaatihomi piwiha nahata nyahi piwihaaraahuni ami utipih jipatipiyohihaapuni katawaasasohiha sahi anitih isiwatiwise. Aiwi windi namaamapi kaapi gwinyaapise. <sup>16</sup> Nyahi nyami Awaisiho Jisasi Kiraisihoaisuni ami Autaahaatiho Apihoaisuni piwaundaati gaapundihaayo. So nyami Awaisiho Jisasi Kiraisisouni ami Autaahaatiho nyami Apihouni nyangi maariho nanyinyamaise. Iyataati ami nyahi gaahapa wapa kamaayaati nehihandi Autaahaatiho gaahati kanyindihanda nyahi wapaapi windi yamaitihaawi nyangi anditinyaisih, ami ko nyangi ipotihandi gaahati kanyitandihuraapi nyahi jatihayo. <sup>17</sup> Ami so nyami Awaisiho Jisasi Kiraisihouni ami Autaahaatiho nyami Apihouni maariho nyangi nanyinyamaise. Ami ko sami maariho neti anditisaiwati ami neti watipisamahonihi ami sahi piwiha gaaha piwaatiwi, ami gaahapa nahataapa sahi nga katitaatiwo.

### Sahi Autaahaatihopi Gaapundiwise Ami Ko Nyangi Anditinyaiwitando

**3** <sup>1</sup>Nyami naisihiyaati nyamataiwi Kiraisihopi giwunyaahohiyihiyaate, piwiha wiwa sangi kamaasatohiwaiwa wani sangi nyahi kasatitihawiyio. Iyataati piwiha ka siyate. Sahi nyapi gaapundiwise, nyahi piwiha Awaisiho Kiraisihopiha ausaahohiha sahi kiyohipatamataiwi isihiya taahiyihiya kaapi maaritiwi nepi, ami kai nepi autaahi isiwatiwi ami kiya keti tariwaiwi atiwi nepi, ami anitiwi isiwatiwi ami kiya kaapi gwinyaito. <sup>2</sup>Ami nyapimaawi gaapundiwise, Autaahaatiho isihiya apipaahi maipihya maatimaatiwihyaami ikwiraatihapi nyangi tinjaati japihi nanyamaito, ami isihiya nahatiya windi Kiraisihopuni ami piwiha kopihya (nyahi ausaahohihaapi) windi atiwi nepi gimaawunyaahowo.

<sup>3</sup>Ami sahihi sami maariho ami ambipati Awaisihomiheti nausawi koai iwinjatiwise, sangi ko anditisiwati ami matoaatipatamatiyati sangi neti nasapopihonihi Uta Maipihya Bwaasirihiri, sangi wapa kasisati ami sangi windi neti namaasopisaisito. <sup>4</sup>Ami Awaisiho nyangi ginyunyaasihi nyahi sapi siyaati gwinyaahaayo, nyahi piwiha watipitaati sangi kasatohiwaiwa sahi wani taawi nga kaiwi ami ipoti ipotisangi sikaiwi sahi nga kaitauho. <sup>5</sup>Nyahi sapi gaapundihaayo nyami Awaisiho Jisaasiho sangi titihesamati neti gisunyaahonihi, ami Autaahaatiho sahi isihiyai maariho numwitaatiwi sangi nasamisihopi bapaiwi nga awaindihandi mmoniwi gisunyaatitando. Iyati ami Jisaasiho sangi jatatananati neti anditisaihonihi, ami sahi kiyaatinihini andititiwi bitopi ami ko napitandihuraapi jatitaatiwo.

### Isihiya Nahatiya Otipipati Kiya Itatamanindaatiwihati Kaitaatiwe

<sup>6</sup>Nyami naisihiyaati nyamataiwi Kiraisihopi giwunyaahohiyihiyaate, nyami Awaisiho Jisasi Kiraisiho watipihandi nanyamindhanda nyahi sangi watipitaati sasatihaato, sami naisihiya Kiraisihomihiya usa kiyaami ikwauhiri ipesawi wipi gwaapwiwi bimohiyihiyaapi sangi yandihini nawisawi bitosawise. Isihiya siya nyahi piwiha winihapipa kasatohirihireti minjapepihiriwi nehi wireti bitohohiyihiyaapito. <sup>7</sup>Ami nyahi kima piwima watipihya kasatihaato nyahi samihatihini sangisaati bimohura nyami ikwauhiri ipesawa wiwa gwaapowaati bindihaamaayo. <sup>8</sup>Nyahi windi samaayo. Nyahi nandapa usaami windi nehi newaati nanihaamaayo. Nawihoni nunya newa nanihaayo. Ami nyahi nyami ikwauhiri mbawaati nesipawa ikwisamanaati daayaati otapihaatuni ami apatihuni akitinihi otipipati waati dipipatisaati kiyahaayo ami sangi pohirisisaati naanhandi namaasamitihawo. <sup>9</sup>Nyahi siyaati kiyohitindi ami sahi nyangi wapa nyatatamanitaatiwihandi owetihimahe. Owe. Ami sahi nyahi kiyohirihireti mmoniwi nepi nyamataiwi kaitaatiwi nyahi

sandi kiyahaayo. Iyaati sahi nandapa wapa nyangi anditinyaiwitandihapa nanyamitaatiwi nyahi nga sangi nasisendihati kati ami sandi windi nyahi kamaitihaawi gwinyaahaawe. Ami nyahi sangi nasisisaihi nyahi kiyohirihireti sahi nyamataiwi kaitaatiwi nasisitahaawi nyahi sandi kiyahaayo. <sup>10</sup>Sahi sawanaati mmoniwi ami gisunyaatitaise. Nyahi sangisaati maasi bimohura piwiha wa sataaha nyahi kasato. Ami utaaho wo pohipiyati ko itatamaninati bimitandihandapi otipipati ko windi kamaayataataahi ami so ko nandapa windi namaanane, sataati kasato. <sup>11</sup>Nyahi sandi sangi sata kasatohitimandi apaapimaasato, ami sapihi samihatihisihiya usa kiyaami ikwauhiri ipesawi wipi nasihasinwi otipipati windi kamaiwi pohipaiwi nehi bimopo, tauhi nyahi piwiha atisahaawito. Saiwi kiya isihya usaapi ami kiyaametirihiretapi nehi piwihaahihi kiyaami otipipatamataiwi nesi kihapihi kihapihimapi kaniwi bimopo, tauhi nyahi atisahaawito. <sup>12</sup>Awaisiho watipihandi nanyamindihanda nyahi watipitaati isihya siyaisi sata kaundihaato. Sahi yatihitiwi bipi napaisaati bindawa nandapa ami wapa wapa sangi jatatamanonihisi bimitaatiwihapaapi otipipati mwithipisawi kaiwise, undaati piwiha watipiha kaundihaato. <sup>13</sup>Ami sahihi nyami naisihyaati nyamataiwi Kiraisihopi giwunyaahohiyihyaate, sahi titihi gaahaiwaahihi kaitaatiwihandapi windi pohipimaiwise. <sup>14</sup>Sapihi ami isihya usa nyahi sangi kimandi utipimandaatihi winihapipa winihisataati piwiha kasatohiwimaiwa windi atihomiwi minjapepahirisaihaahi siyai sahi mwithipisawi usoniwi usitaiwise. Awi sahi kiyaapi nawisawitiwise. Ami siretapi kiyai kiyaami kiyohiwiwaapi sawanai mawitando. <sup>15</sup>Ami siyawaahandi kandi sahi kiyai sami tiworisa sangi manditisisohiyihyaamataiwi mausoniwise. Sandi windi sahi kamaiwi namapi nehi saundiwi, sahi saiwa windi kamaiwise. Namapise undiwi sami naisihya Kiraisihopi giwunyaahohiyihiyai kawisohirihireti kawiiwise.

### **Piwaahonya Kimonya Ipotihonyaare**

<sup>16</sup>Nyahi sapi siyaati gaapundihaayo, ami sangi nyami Awaisiho Jisasi Kiraisiho sawaho sami maariho ambipati neti nahataapaatihi yatihesama wisaiwitando. Isi ko sangisatitane. <sup>17</sup>Kimonya piwaamonya nini Porihonini sangi, gaahuraare satiti nini niwahonisi ikwira penihandi nisi utipihopi jipatipinisihomi ikwiraatihapi neti jipatipiyataayo. Iyataati kimireti kimaindi nahatewa nisi utipihaiwaatihi piwiha asitiputiha jipatipiyataayo. <sup>18</sup>Nini sapi sandi gaapundataayo: Nyami Awaisiho Jisasi Kiraisiho sahi wapa gaahapa windi kamaiwi nehihandi koaisunyaati sahi nahatiyaatangi gaahandi kasisane, ndi nini Porihonini gaapundataayo. Akite!